
ФАРҒОНА ВА БЕЛАРУСНИНГ ГОМЕЛЬ ВИЛОЯТЛАРИ ЎРТАСИДА “ЙЎЛ ХАРИТАСИ” ИШЛАБ ЧИҚИЛИБ, ҲАМКОРЛИК АЛОҚАЛАРИ РИВОЖЛАНТИРИЛАДИ

Кеча вилоят ҳокимининг ўринбосари — вилоят инвестициялар ва ташқи савдо бошқармаси бошлиғи Иқболжон Эргашев Беларуснинг Гомель вилояти иқтисодиёт қўмитаси раиси Игорь Асюк билан видеоалоқа орқали мулоқот ўтказди.

Икки томон вакиллари 2019 йилда имзоланган Фарғона вилояти ва Гомель вилояти ўртасидаги келишув меморандумида кўрсатилган ҳамкорлик алоқаларини янада мустаҳкамлаш, ишларни тизимли йўлга қўйиш учун “Йўл харитаси” ишлаб чиқиш масалаларини муҳокама қилдилар. Таълим, соғлиқни сақлаш, савдо-иқтисодий ва сармоявий ҳамкорликни ривожлантириш истиқболлари кўриб чиқилди.

Иқболжон Эргашев Фарғонадан Гомелга текстил-тўқимачилик ва қишлоқ хўжалиги маҳсулотларини экспорт қилиш таклифини берган бўлса, ўз навбатида Гомель вилояти иқтисодиёт қўмитаси раиси вилоятимизга қишлоқ хўжалиги техникалари, чорва ҳайвонлари, ёғоч-тахталар етказиб бериш имкониятлари ҳақида маълум қилди.

Тадбиркорлар иштирокида Учкўприк туманида сут маҳсулотлари ишлаб чиқариш бўйича қўшма корхона лойиҳасини йўлга қўйиш, мебелчилик яхши ривожланган Бағдод тумани усталарини эса Беларусь ёғоч-тахталари билан таъминлаш, Фарғона вилоятида IT-мутахассисларини тайёрлаш юзасидан фикр-мулоҳазалар алмашилди.

Шунингдек, мулоқотда икки вилоятдаги мавжуд олий таълим муассасалари ўртасида мустаҳкам алоқаларни боғлаш, туризм йўналишида эса Фарғонага тўғридан тўғри авиақатновларни амалга ошириш орқали ижобий натижаларга эришиш таклифлари ўртага ташланди.

Якунда билдирилган таклифларни амалий босқичига ўтиш учун икки вилоят делегацияларининг ўзаро ташрифларини амалга оширишга келишиб олинди.

[Бизни ижтимоий тармоқларда кузатинг Facebook](#),
2021-12-12 19:24:16